



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

6. Kalenderwoche – ab 05. Februar 2011

Erniedrischung

Nee, ham Sie sisch das angedahn - das mid dähm Dschungl-gämb? Bei RDL?

Isch nisch! Nee, isch du das eischendlich ooch gahr nisch rischdisch vorschdehn, was die da so machn dun - im Dschungl! Was wolln die denne dord?

Isch meene, kenndn die nisch viel bessor in de Wiesde gehn? Villeischd in Afghanisdahn un dord e bißl mid de Dallibahn rumalborn? Das däde doch viel schbannendor sein, als wie mid irschendwelsche ehglischn Dschunglvieschor! In Afghanisdahn däds dann womeeschlich sogahr baar Dode gähm. Das däde doch de Einschaldgwodn durschaus sähr bosedief beeinflussn!

Nee, abor meine Gudste sachd, die, die da midmachn dun im Dschungl, die wolln sisch ja nisch aufobforn fiehr de Einschaldgwodn, die wolln bloß ihrn Margdwährd erheehn. Das sin so abgehaldorde Schdars, die keenor mähr rischdisch kenn dud. Irschendwelsche Schlachormiedzn odor Schlachoromas odor Fernsähansachor odor Schbordlor odor anre Leide, die ma irschendwann e bißl in dor Zeidung geschdandn ham. Die wolln ihre nisch mähr vorhandene Beriehdmdheid widdor bißl Offbolliern. Odor ehm sisch ieborhaubd erschdema zum Glänzn bring.

Diesma da soll ja sogahr so e Achduneseschzisorch dabei gewähnsn sein, so e Revoluzzor von dazumals, als wo die driehm ooch noch nisch genau wussdn, dass de Zugunfd dähm Gabidalismus geheern dud. Ja. die Achduneseschzisorch, das warn welsche, die ham e bißl off Gommunismus gemachd. Alles wird gedeeld - Wohnung, Fraun, Kinnor, Hasch, Alg... - ehm alles, was mor so zum Lähm brauchn dud. Abor das is so lange hähr... dähr Aldachduneseschzisorch, dähr da mid im

Dschungl gewähsn is, dähr war ja schon so ald, an dähn sin ja de Madn schon nisch mähr rangegang. Abor was wollde dähr nu dord? Was nidzd denne dähm das, wennor widdor im Lischd dor Effendlichkeed schdehn dud? Will dähr velleisch dehmäschs e Buch schreim? Soll das Buch e Besdsellor wern?

Odor ooch - was wolldn denne die Schlachoromas im Dschungl- gämb? Jagobb-Sisdors! Ham die e Gammbeegg fiehr de Biehne geblahnd? Wolln die dähm Heesdors dähn Rang abloofn? Na, isch meene - zu zweed sinn die immorhin noch äldor als wie dor Heesdors!

Meine Gudste sachd, da had ehm jedor so im Geheimen seine Indressn, wennor da midmachn dud.

Das kennde mor schon vorschdehn! Bablissiedie muss sein!

Abor was meine Gudste ooch nisch vorschdehn dud - warum dun sisch das so viele Leide anguggn? Immorhin solln das baar Milljohn gewähsn sein, die zugeguggd ham, was die da im Dschungl gedriehm ham! Warn das nu bloß alle welsche, die keene Arbeit ham un nisch wissn, wasse mid dor vieln Freizeid anfang solln? Die, die sich ma frein, wens noch baar annre gähm dud, die sisch erniedrischn missn, um een Job zu grischn? Isses weeschn dor Schadnfreide, dass de Leide sowas guggn? Moddo: Wenn annre sisch zum Äbbl machn, da kann jedor härzlich lachn!?

Eduard Sachsenmeyer